

Date – 25/11/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Rajya Sabha MP Pu K. Vanlalvena chuan Manipur buaina sosang zelah chief minister thlak mai a tawk tawh lova, president's rule puan a ngai a ni, a ti.**
- 2. Tuna village council leh local council ding laite hun thla 6 vela pawh tawi a inthlanna buatsaih hma turin inpuahchahna kalpui mek a ni.**
- 3. Jharkhand Mukti Morcha (JMM) hruaitu Hemant Soren chuan nimin khan Jharkhand Governor hnenah sawrkar a siam theih thu a thlen**
- 4. Prime Minister Narendra Modia chuan vawiin hian ICA Global Cooperative Conference chu Bharat Mandapam, New Delhi ah ah hawng dawn.**



RS MP

Mizoram Rajya Sabha MP Pu K. Vanlalvena chuan Manipur buaina sosang zelah chief minister thlak mai a tawk tawh lova, president's rule puan a ngai a ni, a ti.

Akashvani Aizawl hnenah he thu hi sawiin Pu K. Vanlalvena chuan Manipur CM N. Biren Singh thlak ringawt ni lovin president's rule puan a, sorkar laipui-in sipai hmanga buaina a hmeh mih a ngai tawh a ni a ti a. Meitei leh tlangmi ralthuam kengte ralthuam neih zat chu Manipur Polic-te ralthuam ai-in a tam tawh zawk a ni, a ti a. Tunah chuan sorkar laipui-in sipai chakna thapui a hman tangkai a ngai tawh a ni a ti. Sorkar laipui aiawhte'n sipai venna hnuai-ah Meitei leh tlangmite awmna thliar felin an inkarah sipai dah a thisen a luan tawh lohna tura thawh a ngai niin MP chuan a sawi a. Meitei-te pualin inrelbawlna hrang din a, tlangmite tan sorkar hran din a ngai tawh niin a sawi bawk.

Hetih lai hian Mizoram Kohhran Hruaitute Committee (MKHC) chuan thuchhuah siamin tun hnai a Manipur a tharum thawhna avanga nunna hlu tak lak a awm leh ta chu pawh an tih thu an sawi a. Tharum thawhna leh buaina titawp tura inrawlh vat turin central sorkar an ngen. Manipur Jiribam district a tharum thawhna lo hluar leh ta leh biak-in engemawzat tihchhiat leh tihbawrhban a ni chu pawh an tih thu MKHC thuchhuah chuan a tarlang a. Mihring nunna inlaksak, biakin tihchhiat leh inrikrapna ang chi reng reng an

duh loh thu leh sakhaw pakhat biakin bitum bik a awm thin chu tha an tih loh thu an sawi.

Mizoramah hnam hrang hrang an khawsa a, hetih lai a eng hnam bik emaw vau chu tha an tih loh thu MKHC chuan an sawi a. Manipur, a bikin Imphal phairuama Mizo awmte himna ngaihtuah turin thuneitute an ngen bawk a ni.



RICE FOR REFUGEES

Food, Civil Supplies & Consumer Affairs (FCS&CA) department chuan Mizorama raltlan awm mek 40,000 chuang hnena a thlawna sem tur buhfai chu district hmunpui an thlen kim tawh.

FCS&CA department hotute hnen atanga Akashvani Aizawl-in thu a dawn danin Ministry of Home Affairs (MHA)-in cheng vaibelchhe 5 a pek atanga Food Corporation of India (FCI) hnen atanga buhfai an lakchhuah hi metric tonne 1,379 leh quintal 30 a ni a. FCI lamin lakchhuah phalna (release order) an pek veleh atanga la chhuak nghalin sorkar laipui hun tiam, ni 60 ral hma a phur chhuakin District 11 hmunpui theuhah thlen tawhin an district bawrhsapte'n home department ruahmanna siam lawk angin a thlawnin an sem chhuak dawn a, thenkhat chuan an sem chhuak mek tawh a ni. Tun hnai a home department-in sorkar laipui hnena raltlan awm zat an thawnah chuan 43,788 an awm mek a. Myanmar raltlan hi 33,764 an ni a, Bangladesh atanga rawn raltlan hi 2,014 awmin Manipur atanga sahimna zawnga awm mek hi 8,010 an ni. Hetih lai hian Mizorama raltlan awmte hi a changin an pung a, a changin an heu ve bawk.

Myanmar atanga raltlan lo lutte hi kum 2021 February ni 1 atanga mipui thlan sorkar thuneihna pawng laksak a sipai-in rorelna an pumhmawm leh tak hnu lawk atanga Mizorama lo lut an ni a. Bangladesh ram Chittagong Hill Tracts atanga raltlan lo lutte hi kum 2022 November thla chawhnu lama Bangladesh sipai leh helai biala Zofate awm bitna hmun atana thuneihna sang zawk ngiattu Kuki-Chin National Army (KNA) te inkah avang leh tihduhdah an tawrh avanga lo lut an ni a. Manipur atanga lo lutte hi nikum May ni 3-a Meitei leh Zofate inkara chi leh chi buaina a chhuah avanga sahimna zawnga lo lutte an ni.

FCS&CA-in raltlan tana buhfai sem tur an thlen tam zualte chu Champhai, Lawngtlai, Aizawl leh Siaha district te a ni a. Champhai district-ah hian quintal 4,533, Lawngtlai district-ah quintal 2,526, Aizawl district-ah quintal 2,458 leh kg. 40, Siaha district-ah quintal 1,875 te phurh thlen a ni a. Phurh thlen tlemna ber chu Khawzawl district niin quintal 46 chauh a thleng a, Serchhip district-ah quintal 119 leh Mamit district-ah quintal 184 te phurh thlen a ni bawk. Home department lamin ruahmanna an siam dan chuan raltlan pakhat zelin buhfai kg. 31.5 zela a thlawna sem phawt tur a ni ang.



VC/LC VOTERS

Tuna village council leh local council ding laite hun thla 6 vela pawh tawi a inthlanna buatsaih hma turin inpuahchahna kalpui mek a ni.

VC leh LC inthlanna buaipuitu state election commission chuan Zirtawpni khan VC leh LC draft electoral roll chu a tlangzarh a, VC leh LC electoral roll final publication hi nakum January ni 8 a tarchhuah tura ruahman a ni. State election commission thuneitute chuan VC leh LC inthlanna atana hman tur electoral roll hi assembly leh parliament inthlanna atana electoral roll ennawn nena ngaih pawlh loh tur a nih thu an sawi a. Vawiin atang hian electoral roll a awm lote'n thun an duh thu leh sawiselna awmte thehluh hun a intan ang a, He hun hi December ni 9 thleng hawn a ni ang. Claim and objection te hi December ni 20-ah chinfel tura ruahman a ni ang a, Nakum January ni 8-ah VC leh LC inthlanna lo awm tur atana electoral roll hman tur chu tlangzarh a ni dawn a ni.

VC leh LC hun hi kum 5 a ni a. Inthlan hnukung ber khan August ni 17, 2020-ah vote thlak a ni a. Covid hrilen vanglai a nih avangin LC 27 leh VC 8 te hemi ni hian vote an thlak thei lova, a hnu-ah erawh an inthlang ve ta tho a ni. Tun hnai khan Local Administration department chuan hriattirna chhuahin tuna VC term hman mek hi nakum February ni 19 thleng chauh ni turin a puang a. Sorkar hian VC inthlan ruala LC inthlan a nih ve nghal theihna turin hriattirna a chhuah ve thuai dawn ni a thu dawn a ni.

<><><>

EXCISE

Mizoram Excise & Narcotics department chuan kumin January atanga October ni 31 thleng khan Zu leh a kaihnawih chhiah a lak atangin cheng vbc 1, nuai 71, sing 1 sang 9, Zaruk leh Sawmpathum a hmuh chhuah tawh bakah Mizoram Liquor (Prohibition) Act, 2019 hnuaia dan bawhchhia leh dan lova zu zuar mi 4,774 man ni tawhin, thubuai 5,235 ziahluh a ni tawh.

Kumin atang khan Sap zu (Foreign Liquor & Spirit) lakluh atangin chhiah (Excise Duty) cheng vbc 1, nuai 29, sing 8, leh 473 a hmuh bakah chawi leh man atangin cheng nuai 41 leh 140 leh thil dang a kaihnawih atangin cheng sing 3, sang kua a hmu a ni. Tualchher zu leh a siamna hmanraw tam tak an man tawh bawh.

Mizoram Excise & Narcotics department hian kumin chhungin ruihhlo heroin kg 38 leh gram 909 an man tawh a, Ganja kg 554 leh gram 611, Methamphetamine Kg 124 leh gram 427, ruih theih thil dang tam tak man a nih tawh bakah Narcotics Drugs & Psychotropics Substance Act, 1985 tlawhchhanin mi 648 man an ni tawh a, thubuai 468 ziahluh a ni tawh bawh a ni. Autonomous District 3 huamchhung bika hman Mizoram Excise Act, 1973 hnuaiah hian mi 417 man an ni a, he dan hnuaiah hian thubuai ziahluh 192 a awm a, kumin chhung hian ramdang mi zu leh ruihhlo kaihnawih a man mi 40 an awm bawh a ni.

<><><>

AIR ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

JHARKHAND

Jharkhand Mukti Morcha (JMM) kaihhruai INDIA bloc hruaitu Hemant Soren chuan nimin khan Jharkhand Governor Santosh Kumar Gangwar henah sawrkar a siam theih thu a thlen. Pu Soren-a hian Governor hnenah hian sawrkar siam a dil hma hian Chief Minister a nihna atangin banna a thehlut nghal a ni. Chanchinbumite a kawmnaah Pu Soren-a chuan tun thla ni 28 ah hian sawrkar thar laklul inkhawm neih anih tur thu a puang a ni.

Ranchi-a INDIA Bloc MLA thlan tharte chu Hemant Soren hi an hruaitu atan an thlang a. INDIA bloc ah hian JMM bakah Congress, RJD leh CPI (Marxist-Lininist) te an awm a ni.

<><><>

ICA

Prime Minister Narendra Modia chuan vawiin hian ICA Global Cooperative Conference chu Bharat Mandapam, New Delhi ah ah hawng dawn. Kum 130 hnua a vawi khat nan International Cooperative Alliance (ICA) hi a vawi khat nan India ah nghah a ni a. He ni pual hian Pu Modia chuan ICA 2025 hriatrengna stamp a tlangzarh bawk ang.

<><><>

PARLIAMENT

Parliament thlasik thutkhawm chu vawiinah tan a ni dawn a. Thlaleh December ni 20 thleng neih a ni ang. Sawrkar chuan nimin khan New Delhi-ah party tin inhmukkhawm a ko a. He hunah hian Defence Minister Rajnat Singh-a chuan a kaihhruai a. Union Parliamentary Affairs minister Kiren Rijiju chuan chanchinbumite kawmin thlasik thutkhawmah hian eng thil pawh sawiho turin sawrkar chu a inhawng reng tih a sawi.

<><><>